

Pengurusan Harta Keluarga Mengikut Islam dan Realiti Semasa di Malaysia

AHMAD HIDAYAT BUANG

Abstrak

Bersama keteguhan dan kemakmuran yang dinikmati Malaysia kebelakangan ini serta dengan pengenalan kemudahan simpanan dan pelaburan secara Islam, masyarakat Islam di Malaysia telah memperoleh dan memiliki harta dan kekayaan melebihi daripada dahulu secara perbandingannya dengan tempoh masa sebelum kemerdekaan. Kekayaan yang baru ini juga menimbulkan beberapa isu yang berkaitan dengan pengurusan harta dan agihan harta pusaka. Artikel ini merupakan satu percubaan untuk membincang isu-isu ini daripada perspektif perundangan Islam terutama tentang penggunaan prinsip Syariah yang lain secara inovatif dalam pengurusan harta dan agihan pusaka orang Islam di Malaysia.

Family Wealth Management From Islam Perspective and Current Scenario In Malaysia

Abstract

With economic stability and prosperity in recent years together with the introduction of Islamic financial facilities in savings and investments, Muslims in Malaysia have acquired and possessed properties and wealth much more than before in comparison to the period before independence. Together with this new wealth are issues and problems in property management and estate distribution. The paper attempts to discuss these issues from the perspective of Islamic jurisprudence on the use of other alternative and innovative Shar'iah principles in property management and estate distribution.

Pendahuluan

Allah SWT berfirman dalam surah al-Nur ayat 32 yang bermaksud: “Dan kahwinkanlah dari kalangan kamu orang bujang (lelaki dan perempuan) dan orang-orang yang salih daripada hamba-hamba kamu (lelaki dan perempuan) dan sekiranya mereka berada dalam kemiskinan, Allah akan memberikan kekayaan kepada mereka daripada limpah kurnia-Nya”. Ayat boleh difahami sebagai menjelaskan bahawa hidup berkeluarga melalui perkahwinan yang sah akan dijamin rezekinya oleh Allah SWT. Mengikut Imam Qurtubi di dalam tafsirnya, *al-Jami' li Ahkam al-Qur'an*, ayat ini ialah satu janji jaminan rezeki daripada Allah SWT kepada mereka yang mendirikan rumahtangga kerana mengharapkan keredaan Allah dan untuk mengelakkan diri daripada terjerumus kepada maksiat¹. Oleh yang demikian ayat ini secara tidak langsung menunjukkan bahawa penghidupan keluarga itu sebenarnya satu aspek yang produktif dalam sesuatu masyarakat. Ini adalah kerana hidup berkeluarga adalah satu insentif kepada seseorang dalam ahli keluarga itu, baik sama ada suami atau isteri, untuk menjana pendapatan bagi kelangsungan dan keselesaan hidup ahli-ahli keluarga tersebut. Ini ialah sesuatu yang tabi'i.

Realiti Semasa Masyarakat Melayu Islam

Dalam masyarakat Melayu Islam sudah menjadi amalan sejak dari dahulu lagi suami dan isteri berkerja bersama-sama di ladang dan kebun untuk mencari mata pencarian. Ini terbukti melalui amalan adat yang dikenali sebagai harta sepencarian yang diiktiraf oleh Mahkamah sejak dari dahulu lagi². Pada masa kini, suami dan isteri, masih terus sama-sama bekerja untuk menampung perbelanjaan keluarga. Dan sekiranya ada antara isteri yang menjadi suri rumah sepenuh masa, sesetengahnya masih membuat pekerjaan sendiri secara sambilan seperti mengambil upah menjahit, menjual kuih muih dan sebagainya. Kebiasaan sebegini akan membawa kepada pengumpulan harta kepada pasangan suami isteri itu sama ada secara disedari ataupun tidak.

Harta yang terkumpul daripada usaha tadi ada yang hanya sekadar mencukupi untuk meneruskan penghidupan. Namun begitu berdasarkan cara hidup masa kini yang bersifat konsumerisme, di mana harta seperti rumah, kereta, peralatan rumah dan pelbagai lagi boleh dimiliki secara

kredit maka lambat-laun pasangan suami isteri tersebut akan memiliki aset-aset tertentu pada hari tua mereka. Ini ditambah lagi dengan skim-skim wang simpanan, pelaburan, insurans serta takaful sama ada yang diwajibkan oleh undang-undang atau secara sukarela akan menyebabkan harta-harta dalam bentuk tunai akan terkumpul akhirnya. Malah dalam keadaan ekonomi dunia pada masa sekarang yang dikatakan menghadapi masalah, masih terdapat lebih pendapatan di kalangan sesetengah umat Islam di dalam negara ini. Pemilikan aset dan lebih tunai ini baik sama ada yang terkumpul secara beransur-ansur atau secara “durian runtuh” dalam Islam, perlu dibelanjakan sesuai dengan firman Allah SWT yang bermaksud “Dan apa yang Kami kurniakan kepada mereka daripada rezeki hendaklah mereka membelanjakannya” (Surah al-Baqarah, ayat 3). Kenyataan ini tidak bermakna umat Islam tidak perlu menyimpan atau mengumpul harta, bahkan itu yang sewajarnya sebagai persediaan untuk menghadapi hari-hari malang jika berlaku sebagaimana kisah Nabi Allah Yusuf a.s. semasa baginda menjadi menteri kewangan Mesir (Surah Yusuf, ayat 47-49). Oleh yang demikian yang dimaksudkan dengan perbelanjaan di sini adalah yang berkaitan dengan keperluan hidup manusia sebagai pemegang amanah kepada harta dan kekayaan yang dikurniakan oleh Allah SWT.

Perbelanjaan dan Perancangan Pengurusan Harta

Perbelanjaan harta-harta di dalam Islam adalah dalam dua bentuk iaitu perbelanjaan wajib dan perbelanjaan sukarela. Perbelanjaan wajib harta seseorang Islam baik sama ada dia berkeluarga ataupun tidak, ialah bayaran zakat sebagaimana yang telah dimaklumi. Manakala bagi individu yang berkeluarga terutama suami ialah bayaran nafkah kepada isteri dan anak-anak serta orang yang dia bertanggung. Selain itu ialah perbelanjaan sukarela yang terbit baik sama ada daripada akad seperti jual beli, hibah, sewaan dan sebagainya. Perbelanjaan keluarga ini adalah pelbagai untuk menampung keperluan hidup seperti makanan, pakaian, tempat tinggal dan kenderaan. Dalam konteks penghidupan masa kini ialah perbelanjaan pendidikan, kesihatan dan rekreasi. Desakan hidup zaman sekarang tidak seperti dahulu, di mana kesemua aspek penghidupan memerlukan perbelanjaan. Begitu juga struktur masyarakat sudah juga berubah, di mana bantuan kepada

keluarga yang ditimpa kemalangan atau bagi tujuan mencari pekerjaan bukanlah mudah untuk diperoleh pada masa sekarang. Memang benar bahawa kesusahan seseorang Islam yang lain itu akan ditanggung oleh saudaranya seagama. Begitu juga institusi zakat, baitulmal dan wakaf sentiasa boleh membantu orang Islam yang dalam kesusahan. Namun begitu realiti hidup masa kini, tidaklah boleh menjadikan umat Islam itu bergantung semata-mata kepada institusi tersebut kerana proses pentadbiran dan dana yang sedikit jika dibandingkan dengan dana percukaian negara³. Oleh yang demikian umat Islam sendiri terutama kepada yang berkeluarga mesti merancang perbelanjaan mereka untuk mengelak dari ditimpa kesusahan pada masa hadapan.

Bentuk pendapatan masa kini yang bersifat bayaran wang menyebabkan amalan menyimpan atau menabung begitu mudah dilakukan. Bagi pasangan yang baharu mendirikan rumah tangga amatlah penting mereka menyediakan tabungan atau simpanan bagi perbelanjaan keluarga. Gambaran yang selalu terpapar di fikiran ramai di kalangan masyarakat ialah hanya mereka yang pendapatan tinggi mampu untuk menabung dan menyimpan. Tidak dinafikan bahawa pendapatan seseorang yang sedikit itu tidak memungkinkan dia untuk menabung. Namun begitu, apa yang ingin ditekankan di sini adalah seseorang itu tidak perlu untuk menunggu menjadi senang atau kaya baharu akan bermula hendak menabung atau menyimpan. Apa yang perlu difahami ialah menabung itu perlu apabila sahaja seseorang itu mampu melakukannya. Malah seharusnya disemai satu kefahaman bahawa menyimpan dan menabung itu adalah satu kewajipan atau keperluan yang sama seperti makan dan minum. Mungkin pada masa dahulu amat susah untuk menyimpan kerana ketiadaan kemudahan. Jika ada pun kebanyakannya tidaklah berbentuk Islamik⁴. Namun pada masa kini terlalu banyak kemudahan yang selaras dengan ajaran Islam seperti skim simpanan dan pelaburan secara Islam serta takaful. Maka dengan itu tidak ada alasan lagi mengapa setiap orang Islam di negara ini tidak boleh menyimpan atau menabung di dalam mana-mana kemudahan perbankan dan skim pelaburan atau insurans secara Islam. Perbelanjaan keluarga seperti pendidikan dan kesihatan serta bantuan pada waktu kecemasan boleh dirancang melalui usaha menabung dan menyimpan di institusi kewangan Islam sebegini.

Amalan menabung atau menyimpan dikatakan sesuatu perkara

yang agak sukar dilakukan, terlebih lagi di dalam masyarakat yang suka berhutang. Amalan berhutang bukanlah sesuatu yang buruk atau ditegah di dalam Islam. Ia ialah satu keperluan terutama dalam masyarakat yang bersifat konsumerisme pada masa sekarang sebagaimana yang dinyatakan di atas. Apa yang perlu dilakukan adalah untuk menggunakan kemudahan berhutang itu kepada perkara-perkara perlu seperti perumahan, kenderaan, pendidikan dan seumpamanya. Dengan kata lain hutang perlu dirancang dan digunakan kepada perkara perlu⁵. Oleh yang demikian, kemungkinan tidaklah salah untuk menyatakan bahawa kesukaran atau ketiadaan minat untuk menabung di kalangan anggota masyarakat sedikit sebanyak ada kaitan dengan budaya suka berhutang terutama kepada perkara yang tidak perlu. Tabiat untuk menyimpan dan menabung hasil pendapatan tidak syak lagi memerlukan keazaman yang bersungguh-sungguh dan kesabaran yang tinggi. Oleh yang demikian, amalan menyimpan ini dapat dianggap satu jihad kerana kesukaran untuk melakukannya. Begitu juga sebaliknya budaya suka berhutang kepada perkara yang tidak perlu, dapat dianggap sebagai satu bentuk pembaziran yang ditentang oleh Islam kerana ia menghalang amalan menyimpan dan menabung yang terbukti mempunyai faedah yang besar kepada keluarga dan umat Islam.

Apabila harta sudah terkumpul dan tanggungjawab kewangan keluarga sudah selesai atau stabil, maka lazimnya akan timbul keinginan untuk menyerahkan harta itu sebagai hadiah atau pemberian kepada ahli keluarga yang dekat. Perbuatan memberi hadiah atau pemberian ini (*hibah*) ialah suatu yang digalakkan dalam Islam sebagai tanda kasih sayang seseorang itu. Rasulullah SAW pernah bersabda yang maksudnya “berilah hadiah kerana ia akan menambah kasih sayang”⁶. Pemberian atau hadiah ini tidak dilihat sebagai suatu yang merugikan tetapi sesuatu yang memuaskan orang yang memberi kerana dalam perbuatan tersebut Allah SWT campakkan dalam hati manusia perasaan kasih sayang. Perasaan kasih sayang seseorang kepada ahli keluarga yang dekat itu mengatasi perasaan kerugian akibat kehilangan harta tadi, kerana ia akan diganti dengan perasaan gembira dan sukacita kerana dapat memberi harta tersebut kepada orang yang dicintai atau disayangi. Begitu juga perasaan manusia yang bersedekah atau menderma hartanya kepada mereka yang memerlukan, tidaklah dilihat perbuatan itu merugikan, tetapi

hati-hati yang memberi itu penuh dengan kepuasan dan pengharapan pahala daripada Allah SWT. Namun begitu dalam memberi hadiah atau pemberian ini Islam telah menetapkan beberapa etika. Antaranya pemberian seseorang ayah atau ibu kepada anak-anaknya adalah *afdal* disamaratakan. Makruh seseorang ayah atau ibu itu melebih-lebihkan pemberian harta kepada anak yang tertentu sahaja. Bahkan ada ulama yang berpendapat haram tidak menyamakan pemberian kepada anak-anak⁷. Tujuan *Syarak* menganjurkan agar disamakan pemberian antara anak-anak adalah supaya tidak timbul perasaan prejudis anak kepada kedua-dua orang tuanya dan perseteruan atau rasa tidak puas hati sesama anak itu. Perkara ini adalah jelas dan tidak perlu kepada penerangan dan boleh difahami secara mudah.

Persoalan seterusnya yang lebih banyak diperkatakan ialah bagaimana harta itu hendak ditinggalkan kepada waris-waris atau ahli keluarga selepas kematian seseorang. Sekali lagi, sebagaimana sikap acuh tidak acuh masyarakat Islam kepada perancangan untuk menabung dan menyimpan pendapatan pada hari muda sebagai persiapan hari tua, maka begitu jugalah sikap mereka terhadap perancangan bagaimana harta tersebut sebaiknya ditinggalkan kepada waris. Lumrahnya ramai yang beranggapan apa yang ditinggalkan oleh seseorang yang telah meninggal dunia itu kepada warisnya bukanlah urusan yang perlu dirisaukan, apatah lagi perlu dirancang bagaimana patut ia ditinggalkan kepada ahli keluarga. Kefahaman ini diperkuatkan lagi dengan dakwaan bahawa dalam Islam, harta yang ditinggalkan kepada waris-waris itu mesti diagihkan secara faraid sahaja dan tiada cara lain lagi. Oleh itu, kenapa perlu dirancang harta seseorang selepas kematiannya kerana sistem agihannya sudah tersedia melalui faraid, bahkan jika dirancang mungkin boleh menyebabkan berlawanan dengan hukum faraid. Dan hukum faraid adalah hukum Allah SWT yang jelas termaktub dalam al-Quran, mengapa perlu bentuk yang lain?

Hujah-hujah ini jika diperhatikan secara mendatar, tanpa renungan dan tersendiri yang terpisah daripada faktor-faktor sosial, persekitaran dan perubahan masa mempunyai asas-asas dan logiknya serta tidak mudah untuk disangkal. Namun sebagaimana kata ulama mujaddid terkenal, Sheikh Waliullah al-Dahlawi (m.1718 Masehi) di

dalam kitabnya *Hujjatul Allah al-Balighah* setiap hukum yang Allah SWT turunkan itu ada hikmat dan tujuannya yang tertentu.⁸ Tujuan hukum faraid adalah untuk memudahkan agihan harta selepas kematian kerana bahagian pusaka ahli-ahli keluarga yang berhak sudah ditentukan sendiri oleh al-Quran. Hukum faraid jika dilihat dari sudut sejarah ialah satu revolusi agihan harta selepas kematian dalam masyarakat dunia ketika itu, iaitu memberi hak kepada mereka yang berhak berasaskan perhubungan kekeluargaan tanpa mengira sama ada mereka itu lemah atau kuat, kaya atau miskin, lelaki atau wanita, kecil atau besar dan sebagainya.⁹ Sudah tentu sistem agihan faraid ialah suatu yang sangat berfaedah kepada masyarakat manusia ketika itu dan juga kini. Asas hukum faraid dari segi hukumnya, adalah *qat'i* baik dari segi *dilalah* atau *thubut*. Ini bermaksud asas hukumnya tidak boleh dipertikaikan dari segi peruntukan hukumnya dan sabitnya sebagai benar dan betul. Oleh yang demikian, cadangan sesetengah pihak untuk mengkaji semula hukum faraid terutama yang berkaitan dengan agihan antara lelaki dan wanita adalah tidak selaras dengan kaedah hukum Syariah yang telah diterima secara konsensus.¹⁰ Namun begitu, ramai yang tidak mengetahui bahawa selepas penentuan bahagian waris ini mengikut apa yang ditetapkan oleh Syarak, waris-waris berkenaan boleh melepaskan hak-hak tersebut. Mereka tidak semestinya wajib menerima ketentuan tersebut setelah hak tersebut menjadi milik mereka.

Keadaan masyarakat, sistem ekonomi dan pentadbiran negara mengalami berbagai-bagai perubahan jika hendak dibandingkan dengan masa lalu. Perubahan ini secara tidak langsung memberi sedikit cabaran kepada sistem agihan pusaka secara faraid. Antara contoh daripada pengalaman pegawai yang menguruskan agihan pusaka orang-orang Islam yang boleh ditunjukkan di sini ialah pemecahan tanah atau perkongsian tanah atas satu daftar tanah akibat penyelesaian secara faraid.¹¹ Pemecahan tanah atau perkongsian tanah yang kecil saiznya secara ramai mengikut ilmu ekonomi ialah suatu amalan yang merugikan kerana masalah pengurusan dalam membangunkan tanah tersebut. Agihan secara faraid ini juga dikatakan menyebabkan kelewatan memproses penurunan tanah daripada si mati kepada waris-warisnya, sekiranya terdapat pertikaian tentang agihan tersebut. Beberapa sarjana perundangan Syariah di Malaysia cuba mempertahankan sistem faraid

dengan menyatakan kelemahan dan kelewatan sistem pentadbiran pusaka berpunca daripada waris-waris itu sendiri dan bukan daripada sistem faraid.¹² Mengikut mereka selepas penentuan hak waris-waris mengikut faraid mereka perlu berbincang bagaimana jalan terbaik untuk mengagihkan harta mereka. Lazimnya perbincangan yang dicadangkan oleh sarjana-sarjana ini sukar untuk dilaksanakan kerana psikologi manusia itu terlalu cintakan kepada harta, walaupun sedikit serta sanggup mengorbankan perhubungan silaturahim sesama kaum keluarga.¹³

Terdapat masalah-masalah lain yang memberi cabaran kepada sistem faraid, namun oleh sebab kesempitan ruang masalah tersebut tidak dapat dibincangkan di sini. Apa yang perlu ditekankan di sini adalah kerana terdapat rungutan-rungutan baik daripada pihak yang mentadbir mahupun daripada masyarakat itu sendiri tentang masalah-masalah agihan pusaka secara faraid.¹⁴ Penyelesaian kepada masalah ini perlu dicadangkan dan dilaksanakan supaya imej Islam sebagai agama yang amat mementingkan kemaslahatan umat manusia tidak tercemar. Terdapat banyak kekuatiran terutama dari kalangan ulama bahawa cadangan yang dikemukakan oleh sesetengah pihak bagi menyelesaikan masalah ini merupakan satu percubaan untuk mengelakkan hukum faraid. Kekuatiran ini mungkin berpunca dengan hanya melihat kepada pelaksanaan hukum faraid secara mikro dan simplistik tanpa menimbang faktor-faktor sosial, ekonomi dan masyarakat Islam masa kini. Hakikatnya hukum Syariah itu ibarat lautan dan mutiaranya itu tidak terhitung untuk dikutip dan digilap bagi kegunaan dan kemaslahatan manusia. Hukum Syariah tidak bermaksud untuk menutup peluang-peluang yang boleh digunakan bagi kemaslahatan dan kebajikan manusia sesuai sebagaimana kata yang masyhur di dalam hadith yang bermaksud: “apa-apa yang dirasai baik oleh umat Islam, maka itulah yang baik di sisi Allah”.¹⁵ Kenyataan ini bermaksud dalam ruang lingkup yang dibenarkan oleh Syariah, inovasi dan kreativiti kepada masalah yang dihadapi perlu dicari dan digalakkan. Prinsip-prinsip agihan dan perancangan harta keluarga dalam hukum Syariah selain faraid seperti hibah, wasiat, wakaf dan nazar perlu dikembangkan.¹⁶

Pengembangan prinsip-prinsip di atas, tidak harus dilihat sebagai pengelakan atau pengabaian kepada hukum faraid, tetapi sebagai satu pelengkap atau komplementari. Prinsip-prinsip ini hendaklah

dikembangkan sejajar dengan hukum faraid bagi membolehkan masyarakat Islam merancang agihan harta mereka secara yang lebih baik, sesuai dengan perkembangan dan cabaran semasa. Sungguhpun demikian, dari perspektif jurisprudens Islam, prinsip-prinsip ini adalah independen kepada faraid itu sendiri. Yang dimaksudkan pelengkap atau komplementari di sini digunakan bagi tujuan untuk mengelakkan kontroversi dakwaan pihak-pihak yang menyatakan pengembangan prinsip ini adalah sebagai satu pengabaian atau pengelakkan kepada hukum faraid. Oleh yang demikian, sungguhpun terdapat ciri-ciri agihan harta prinsip-prinsip di atas yang secara zahirnya berbeza dengan hukum faraid, ini tidak bermakna pengabaian hukum Syariah kerana prinsip-prinsip itu sendiri ialah hukum Syariah. Bagaimana hukum Syariah boleh dianggap mengabai hukum Syariah sendiri? Dalam hukum jual beli, sebagai contoh, amalan riba dilarang, terdapat ulama yang membenarkan *bay' al-'inah* sebagai alternatif kepada pinjaman peribadi konvensional. *Bay' al-'inah* dibenarkan sungguhpun asas Syariahnya dipertikaikan secara keras oleh sesetengah ulama yang lain.¹⁷ Maka di atas analogi yang sama adalah tidak wajar prinsip-prinsip Syariah dalam perancangan harta orang Islam seperti hibah, wasiat, wakaf dan nazar dipertikaikan kerana kesemuanya mempunyai asas Syariah yang kukuh.

Mungkin ada yang mempertikaikan bahawa prinsip tersebut sudah melalui proses pengubahsuaian yang menyebabkan konsep asal prinsip tersebut berubah dan mungkin bertentangan dengan hukum faraid dan juga wasiat Islam.¹⁸ Hujah begini bukanlah sesuatu yang asing dalam sejarah perkembangan fiqh Islam, kerana ia sering dibangkitkan apabila sahaja timbul sesuatu konsep baharu yang hendak diperkenalkan sejak dari dahulu lagi. Bagi pelajar undang-undang Syariah sudah tentu biasa mendengar kaedah yang berbunyi “asal sesuatu itu harus hukumnya kecuali terdapat dalil yang melarangnya”.¹⁹ Menggunakan kaedah ini, prinsip-prinsip fiqh tersebut wajar dikembangkan sesuai dengan perkembangan zaman. Perkembangan prinsip-prinsip ini tidak harus diketatkan, bahkan perlu digalakkan. Imaginasi, inovasi dan kreativiti dalam fiqh Islam tidak harus disekat dengan alasan ia bercanggah dengan konsep-konsep yang dibina melalui perantara fiqh atau *ijtihad*. Yang harus disekat ialah kelemahan, kebuntuan, retorik serta apologetik fiqh yang boleh dianggap berkonfrontasi dengan persoalan semasa.

Dalam konteks pengurusan harta orang-orang Islam, sudah sampai masanya produk-produk perancangan harta orang Islam seperti wasiat, hibah harta atau amanah hibah dan seumpamanya dalam bentuk yang baharu dan bersesuaian dengan konsep semasa disokong oleh masyarakat dan sarjana Islam. Produk-produk ini bukan sahaja sebagai bukti kepada kedinamikan Syariah Islam dalam menyelesaikan masalah ummah, tetapi juga mampu memperkukuh kedudukan ekonomi umat Islam di tanah air yang merupakan satu-satunya aspek, selain daripada ilmu pengetahuan, yang mampu dikuasai oleh umat Islam di Malaysia kini. Umat Islam di Malaysia dan juga di dunia harus bangun menggunakan senjata ekonomi bagi mencemerlangkan dan mengemilangkan kembali maruah Islam, kerana inilah senjata yang termampu diperjuangkan oleh umat Islam pada masa kini.²⁰

Penutup

Daripada perbincangan di atas dapat disimpulkan bahawa terdapat keperluan untuk mengadakan modul atau skim perancangan harta di dalam Islam terutama yang melibatkan selepas kematian. Keperluan ini timbul akibat daripada peningkatan dan kemajuan dalam ekonomi umat Islam terutama di Malaysia dan permasalahan yang timbul daripada pentadbiran harta pusaka. Gabungan antara dua faktor ini menyebabkan beberapa cadangan dikemukakan untuk merancang harta orang-orang Islam mengikut cara atau kaedah yang dibenarkan oleh Syariah. Namun begitu penyelesaian perkara ini tidaklah mudah memandangkan terdapat beberapa cabaran terutama penggunaan kaedah yang sesuai selaras dengan Hukum Syarak untuk merancang harta berkenaan. Oleh yang demikian amatlah penting usaha-usaha untuk memberi cadangan mengenai kaedah dan yang sesuai bagi perancangan harta orang-orang Islam yang selaras dengan Syariah diteruskan pada masa hadapan.

Nota hujung

- 1 Imam Qurtubi, (2003), *al-Jami' Li Ahkam al-Qur'an*, Riyadh: Dar A'lam al-Kutub, Jilid. 12, hlm.239-240.
- 2 Lihat kes *Roberts @ Kamarulzaman v. Umi Kalthom* (1966) 1 MLJ 153; (1402/1981) 1 JH 82; *Haji Abdul Rahim v. Isngatun* (1402/1981) 2 JH, 264; *Hajjah Lijah bte Jamal v. Fatimah bte Mat Diah* (1977) MLJ 90; *Sopiah bte Sulaiman v. Abdullah bin Mat Amin* (1977) MLJ 90; *Wan Mahaton v. Hj. Abdul Samat* (1937) Vol. 15, Part I JMBRAS, 25 dan; *Habshah bte Mat v. Abdullah bin Jusoh* (1950) MLJ 60. Bagi perbincangan lebih mendalam lihat Suwaid Tapah (2003), "Harta Sepencarian dan Wang Simpanan KWSP: Satu Perbincangan Dari Sudut Sumbangan Secara Tidak Langsung", *Jurnal Syariah*, Jilid 11, Bilangan 1, hlm.1-22 dan Mohd Ridzuan Awang (2002), "Harta Sepencarian: Perkembangannya dan Kajian Kes", *Isu Syariah dan Undang-undang Siri 11*, Bangi, Jabatan Syariah, Fakulti Pengajian Islam, UKM, hlm.14-31.
- 3 Kajian oleh Muhamad Syukri Salleh menyifatkan masalah ini sebagai "jurang perhubungan antara pusat-pusat pengurusan zakat dengan asnaf-asnafnya". Lihat Muhamad Syukri Salleh (2006), "Lokalisasi Zakat: Satu Cadangan Teoritis", dalam Abdul Ghafar Ismail dan Hailani Muji Tahir (eds.), *Zakat: Pencyariatan, Perekonomian dan Perundangan*, Bangi: Penerbit UKM, hlm.214-215 dan Ahmad Hidayat Buang, (1999), "Kutipan dan Agihan Zakat di Wilayah Persekutuan Kuala Lumpur Bagi Tempoh 1985-1995: Satu Pemerhatian", *Jurnal Syariah*, Jilid. 7, Bilangan 2, hlm.152.
- 4 Laporan daripada Bendahari Negeri Perak pada masa sebelum peperangan dunia kedua menyatakan bahawa di Perak tidak ada satu pun simpanan tetap atas nama Melayu di cawangan Chartered Bank tempatan ...", lihat William R. Roff (1984), *Kerjasama dan Koperasi di Semenanjung 1910-1941*, Kuala Lumpur: Penerbit Universiti Malaya, hlm.39. Untuk perbincangan yang berkaitan lihat juga Shirle Gordon, "Contradictions in the Malay Economic Structure", *Intisari*, hlm.30-32. Manakala perbincangan cara-cara tabungan pada masa dahulu lihat Swift, M.G. (1964), "Capital, Saving and Credit in a Malay Peasant Economy", dalam Raymond Firth dan B.S Yamey (eds.), *Capital, Saving and Credit in Peasant Societies: Studies From Asia, Ocenia, The Caribbean dan Middle America*, London: George Allen and Unwin Ltd., hlm.134-141
- 5 Surtahman Kastin Hasan (2002), "Perbelanjaan Bermanfaat dan Tidak Membazir Mengikut Perspektif Islam", *Jurnal Syariah*, Jilid 10, Bilangan 2, Julai 2002, hlm.87-96.

- 6 al-San'ani (t.t.), *Subul al-Salam*, Bandung Pustaka Dahlan, juzuk 3, hlm.92.
- 7 Lihat sebagai contoh al-Syawkani (t.t.), *Nayl al-Awtar*, Beirut: Dar al-Ihya' al-Turath, juzuk 6, hlm.9.
- 8 Wali Allah al-Dahlawi, *Hujjatul Allah al-Balighah* (diedit oleh Sayyid Sabiq), Kaherah: Dar al-Kutub al-Hadithah, juzuk 1, hlm.9.
- 9 Jasni Sulong (2006), "Kedudukan Wanita Dalam Pembahagian Pusaka", *Jurnal Syariah*, Jilid 14, Bilangan2, hlm.126-127.
- 10 Sebagai contoh kenyataan Sandra Balchin, seorang ahli pertubuhan Musawah, sebagai berkata: "the rules of inheritance are outdated because they are interpreted according to historical context... this does not reflect the reality of the situation...". *New Straits Times*, 13 Disember 2009, hlm. 13.
- 11 Ahmad Hidayat Buang (2005), "Perkembangan dan Isu-isu Undang-undang Pusaka dan Wasiat di Malaysia", dalam Ibidem (ed.), *Mahkamah Syariah di Malaysia: Pencapaian dan Cabaran*, Kuala Lumpur: Penerbit Universiti Malaya, hlm.147-149.
- 12 Nik Mohd Zain bin Haji Nik Yusof, (1999), "Pentadbiran Harta: Pembangunan Harta Pusaka", dalam Abdul Monir Yaacob dan Mohd Fauzi Mustaffa (eds.), *Pentadbiran Harta Menurut Islam*, Kuala Lumpur: IKIM, hlm.61
- 13 Lihat "Anak gagal tuntutan harta ayah RM1.7 juta daripada ibu", *Utusan Malaysia*, 24 Disember 2003 dan "Anak Shaikh Dawood tuntutan harta pusaka RM1 bilion" *Utusan Malaysia*, 28 Julai 2005.-71.
- 14 Nik Mohd Zain bin Haji Nik Yusof, *op.cit.* hlm.147-148. Lihat juga Ahmad Hidayat Buang (2005), *op.cit.*
- 15 *Musnad Imam Ahmad bin Hanbal* (diedit oleh Ahmad Muhammad Syakir), Mesir: Dar al-Ma'arif, jilid 5, 1949, hlm.211.
- 16 Siti Zalikah Md Nor (2002), "Pengurusan Wakaf, Wasiat dan Hibah di Malaysia", *Isu Syariah dan Undang-undang Siri 11*, Bangi: Jabatan Syariah, Fakulti Pengajian Islam, UKM, hlm.1-12, Mohd Ridzuan Awang (2003, "Pelaksanaan Harta Hibah", *Isu Syariah dan Undang-undang Siri 12*, Bangi: Jabatan Syariah, Fakulti Pengajian Islam, UKM, hlm.89-103 dan Jasni Sulong (2005), Wasiat Kepada Waris: Pembaharuan Undang-undang dan Penggubalan di Selangor, Malaysia", *Jurnal Syariah*, Jilid 13, Bilangan 2, hlm.47-64.



- 17 Mahmood Sanusi dan Saiful Azhar Rosly (2001), “Some Issue of Bay’ al-‘Inah in Islamic Financial Markets”, *The Arab Law Quarterly*, vol. 16, no. 3, hlm.264.
- 18 Lucy Carol, “Life Interest and Inter-Generational Transfer of Property Avoiding the Law of Succession”, *Islamic Law and Society*, 8:2, 2001, hlm.269.
- 19 al-Sayuti, *Al-Asybah wa al-Naza’ir*, Lubnan: Dar al-Kutub al-Ilmiyyah, jil.1, hlm. 60.
- 20 Ahmad Zahid bin Hamidi, (2008), “Membangun Ekonomi Ummah Menerusi Instrumen Faraid dan Hibah”, *Jurnal Muamalat*, Bilangan 1, hlm.1-7.



RUJUKAN

- Ahmad Hidayat Buang (2005), “Perkembangan dan Isu-isu Undang-undang Pusaka dan Wasiat di Malaysia”, dalam *Mahkamah Syariah di Malaysia: Pencapaian dan Cabaran*, Kuala Lumpur, Penerbit Universiti Malaya.
- Ahmad Hidayat Buang, (1999), “Kutipan dan Agihan Zakat di Wilayah Persekutuan Kuala Lumpur Bagi Tempoh 1985-1995: Satu Pemerhatian”, *Jurnal Syariah*, Jilid. 7, Bilangan 2, Kuala Lumpur, Penerbit Universiti Malaya.
- Ahmad Zahid bin Hamidi, (2008), “Membangun Ekonomi Ummah Menerusi Instrumen Faraid dan Hibah”, *Jurnal Muamalat*, Bilangan 1, Kuala Lumpur, JAKIM.
- Al-San’ani (t.t), *Subul al-Salam*, Bandung, Pustaka Dahlan.
- Al-Sayuti (1998), *Al-Asybah wa al-Naz’ir*, Beirut, Dar al-Kutub al-Ilmiyyah.
- A-Syawkani (t.t.), *Nayl al-Awtar*, Beirut, Dar al-Ihya’ al-Turath.
- Imam Qurtubi (2003), *al-Jami’ Li Ahkam al-Qur’an*, Riyadh: Dar A’lam al-Kutub.
- Jasni Sulong (2005), Wasiat Kepada Waris: Pembaharuan Undang-undang dan Penggubalan di Selangor, Malaysia”, *Jurnal Syariah*, Jilid 13, Bilangan 2, Kuala Lumpur, Penerbit UKM.
- Jasni Sulong (2006), “Kedudukan Wanita Dalam Pembahagian Pusaka”, *Jurnal Syariah*, Jilid 14, Bilangan 2, Kuala Lumpur, Penerbit Universiti Malaya.
- Kastin Hasan (2002), “Perbelanjaan Bermanfaat dan Tidak Membazir Mengikut Perspektif Islam”, *Jurnal Syariah*, Jilid 10, Bilangan 2, Julai 2002, Kuala Lumpur, Penerbit Universiti Malaya.
- Lucy Carol, “Life Interest and Inter-Generational Transfer of Property Avoiding the Law of Succession”, *Islamic Law and Society*, 8:2, 2001.
- Mahmood Sanusi dan Saiful Azhar Rosly (2001), “Some Issue of Bay’ al-‘Inah in Islamic Financial Markets”, *The Arab Law Quarterly*, vol. 16, no. 3.
- Mohd Ridzuan Awang (2002), “Harta Sepencarian: Perkembangannya dan Kajian Kes”, *Isu Syariah dan Undang-undang Siri 11*, Bangi, Jabatan Syariah, Fakulti Pengajian Islam, UKM.
- Mohd Ridzuan Awang (2003), “Pelaksanaan Harta Hibah”, *Isu Syariah dan Undang-undang Siri 12*, Bangi: Jabatan Syariah, Fakulti Pengajian Islam, UKM.

Muhamad Syukri Salleh (2006), "Lokalisasi Zakat: Satu Cadangan Teoritis", dalam Abdul Ghafar Ismail dan Hailani Muji Tahir (eds.), *Zakat: Pensiaryatan, Perekonomian dan Perundangan*, Bangi: Penerbit Universiti Kebangsaan Malaysia.

Musnad Imam Ahmad bin Hanbal (1949) (diedit oleh Ahmad Muhammad Syakir), Mesir, Dar al-Ma'arif.

Nik Mohd Zain bin Haji Nik Yusof, (1999), "Pentadbiran Harta: Pembangunan Harta Pusaka", dalam Abdul Monir Yaacob dan Mohd Fauzi Mustaffa (eds.), *Pentadbiran Harta Menurut Islam*, Kuala Lumpur, IKIM.

Shirle Gordon, "Contradictions in the Malay Economic Structure", *Intisari*.

Siti Zalikhah Md Nor (2002), "Pengurusan Wakaf, Wasiat dan Hibah di Malaysia", *Isu Syariah dan Undang-undang Siri 11*, Bangi: Jabatan Syariah, Fakulti Pengajian Islam, Penerbit Universiti Kebangsaan Malaysia.

Suwaid Tapah (2003), "Harta Sepencarian dan Wang Simpanan KWSP: Satu Perbincangan Dari Sudut Sumbangan Secara Tidak Langsung", *Jurnal Syariah*, Jilid 11, Bilangan 1, Kuala Lumpur, Penerbit Universiti Malaya.

Swift, M.G. (1964), "Capital, Saving and Credit in a Malay Peasant Economy", dalam Raymond Firth dan B.S Yamey (eds.), *Capital, Saving and Credit in Peasant Societies: Studies From Asia, Ocenia, The Caribbean dan Middle America*, London, George Allen and Unwin Ltd.

Wali Allah al-Dahlawi, *Hujjatul Allah al-Balighah* (diedit oleh Sayyid Sabiq), jld. 1, Kaherah, Dar al-Kutub al-Hadithah.

William R. Roff (1984), *Kerjasama dan Koperasi di Semenanjung 1910-1941*, Kuala Lumpur: Penerbit Universiti Malaya.

New Straits Times
Utusan Malaysia.